

八

編

類

纂

久知

八編類纂卷之二十三

經濟編

六曹類

吏曹

田忌去齊奔楚楚王郊迎至舍問曰楚萬乘之國也齊亦萬乘之國也常欲相并爲之奈何對曰易知耳齊使申孺將則楚發五萬人使王將軍將之至禽將軍首而反耳齊使田居將則楚發二十萬人使上將軍將之分別而相去也齊使眭子將楚發四封之內王自出將田忌從相國上將軍爲左右司馬如是則

王僅得存耳。於是齊使申孺將楚發五萬人使上將軍至擒將軍首反。於是齊王忿然乃更使盼子將楚悉發四封之內。王自出將田忌從相國上將軍爲左右司馬益王車屬九乘僅得免耳。至舍王北面正領齊袪。問曰先生何知之早也。田忌曰申孺爲人侮賢者而輕不肖者。賢不肖者俱不爲用。是以亡也。田居爲人尊賢者而賤不肖者。賢者負任不肖者退。是以分別而相去也。盼子之爲人也尊賢者而愛不肖者。賢不肖俱負任。是以王僅得存耳。

劉惔每奇桓溫才而知其有不臣之迹。及溫爲荊州。

惓言於明帝曰溫不可使居形勝地其位獬常宜抑之勸帝自鎮上流而已爲軍司常不納又請自行復不聽及溫伐蜀時咸謂未易可制惟惓以爲必尅或問其故云以捕博驗之其不必得則不爲也恐溫終專制朝廷及後竟如其言

宋王曾旣不受會靈觀使上意不懌王欽若數譖之會曾市賀皇后家舊第其家未徙而曾令入昇土置其門賀氏訴于朝遂罷曾政事王旦在告聞之曰王君介然他日德望勲業甚大顧予不得見爾或請其故曰王君昨讓觀使雖拂上旨而詞直氣和了無所

正罪

懼且始被進用已能若是我自任政事二十年每進對稍忤卽蹙躅不能自容以是知其偉度矣

范仲淹富弼罷去琦不能獨居上䟽辨析且言近日臣僚多務攻擊忠良取快私忿不報初陝西四路總管鄭戩遣靜邊砦主劉滬著作佐郎董士廉城水洛以通秦渭援兵知渭州尹洙以爲前此屢困于賊者止由城砦多而兵勢分也今又益城不可奏罷其役會戩罷而滬等督役如故洙不平以張忠代之滬不受代洙乃諭裨將狄青往械滬及士廉下吏而罷水洛之役戩論奏不已琦是洙而朝議右戩竟徙洙知

慶州釋滬等獄而復城水洛琦乃請外遂出知揚州
河東轉運使歐陽修上疏論奏羣邪益忌修因傳致
修罪左遷知滁州洙博學有識度以爲自唐以來文
格卑弱至柳開始爲古文而世未知宗尚乃與穆修
復振起之爲文簡而有法元昊反洙未嘗不在兵間
故於西事尤爲練習未幾卒

臣聞士不忘身不爲忠言不逆耳不爲諫故臣不避
羣邪切齒之禍敢冒一人難犯之顏惟賴聖慈幸加
省察臣伏見杜衍韓琦范仲淹富弼等皆是陛下素
所委任之臣一旦相繼而罷天下之士皆素知其可

用之賢而不聞其可罷之罪臣職雖在外事不密知然臣竊見自古小人讒害忠賢其識不遠欲廣陷良善則不過指爲朋黨欲擺動大臣則必須誣以專權其故何也夫去一善人而衆善人尚在則未爲小人之利欲盡去之則善人少過難爲一二求瑕惟指以爲朋黨則可一時盡逐至如大臣已被知過而蒙信任者則不可以他事動搖惟有專權是人主之所惡故須此說方可傾之臣料杜衍等四人各無大過而一時盡逐富弼與仲淹委任尤深而忽遭離間必在朋黨專權之說上惑聖聰臣請詳言之晉年仲淹初

以忠言讜論聞于中外天下賢士爭相稱慕當時奸臣誣作朋黨猶難辨明自近日陛下擢此數人並在兩廡察其臨事可以辨也蓋杜衍爲人清慎而謹守規矩仲淹則恢廓自信而不疑韓琦則純正而質直富弼則明敏而果銳四人爲性既各不同雖皆歸於盡忠而其所見則各異故於議事多不相從至如杜衍欲深罪滕宗諒仲淹力爭而寬之仲淹謂契丹必攻河東請急修邊備富弼料九事力言契丹必不來至如尹洙亦號仲淹之黨及爭水洛城事韓琦則是尹洙而非劉滬仲淹則是劉滬而非尹洙此數事尤

彰著陛下素已知者此四人者可謂公正之賢也平日閒居則相稱美之不暇爲國議事則公言廷爭而無私以此而言臣見衍等真得漢史所謂忠臣有不和之節而小人讒爲朋黨可爲誣矣臣聞有國之權誠非臣下之得專也臣竊思仲淹等自入兩府已來不見其專權之迹而但見其善避權也夫權得名位則可行故行權之臣必貪名位自陛下召琦與仲淹於陝西琦等讓至五六陛下亦五六召之至如富弼三命學士兩命樞密副使每一命未曾不懇讓者愈切而陛下用之愈堅故天下之人所共知臣但見避

讓太繁不見其專權貪位也。及陛下堅不許辭，方敢受命。然猶未敢別有所爲。陛下見其作事如此，乃開天章召而賜坐，授以紙筆，使其條事。然衆人謙論不敢下筆，弼等亦不敢獨有所述。因此又煩聖慈出手詔，指定姓名，專責其條列大事而行之。弼等遲回，近及一月，方敢略條數事。仲淹老練世事，必知凡百難，猛更張，故其所陳志在遠大，而多若迂緩。但欲漸而行之，以久冀皆有效。弼性雖銳，然亦不敢自出意見。但舉祖宗故事，請陛下擇而行之。自古君臣相得一言，道合遇事而行，更無推避。弼等蒙陛下堅意委任。

督責丁寧而猶遲緩自疑作事不果然小人巧譁而
曰專權者豈不誣哉至如兩路宣撫國朝累遣大臣
况自中國之威近年不振故元昊叛逆一方而勞困
及於天下北虜乘釁違盟而動其書辭侮慢有貴國
祖宗之言陛下憤耻雖深但以邊防無備未可與爭
屈志買和誠莫大之辱弼等見中國累言侵陵之患
感陛下不次進用之恩故各自請行力思雪耻汾山
傷海不憚勤勞欲使武備再修國威復振臣見弼等
用心本欲尊陛下威權以禦四夷未見其侵權而作
過也伏惟陛下睿哲聰明有知人之聖臣下能否洞

達不遺故於千官百辟之中親選得此數人一旦罷去而使羣邪相賀於內四夷相賀於外此臣所以爲陛下惜也伏惟陛下聖德仁慈保全忠善退去之際恩禮各優今仲淹四路之任亦不輕矣願陛下拒絕羣謫委信不疑使盡其所爲猶有裨補方今西北二虜交爭未已正是天與陛下經營之時而弼與琦豈可置之閒處伏望早辨讒巧特加圖任則不勝幸甚臣自前歲召入諫院十月之內七受聖恩而致身兩制常恩榮寵至深未知報效之所羣邪爭進讒巧而正士繼去朝廷乃臣忘身報國之時豈可緘言而避

罪敢竭愚軀。惟陛下擇之。

歐陽修論杜韓范富疏

范仲淹富弼既出宣撫攻者益衆二人在朝所爲亦稍沮止杜衍獨左右之衍好薦引賢士而抑僥倖羣小咸怨衍。婚蘇舜欽易簡子也能文章論議稍侵權。貫時監進奏院循例祠神以伎樂娛賓集賢校理王益柔曙之子也。於席上戲作俳歌。御史中丞王拱辰聞之以二人皆范仲淹所薦而舜欽又衍婿因是傾衍。及仲淹乃諷御史魚周詢劉元瑜舉劾其事拱辰及張方平列狀請誅益柔章得象無所可否。賈昌朝陰主之韓琦言於仁宗曰益柔狂語何足深計方平

等皆陛下近臣。今西陲用兵。大事何限。一不爲陛下
論列。而同狀攻一王益柔。此其意可見矣。帝感悟。乃
止黜益柔。監復州酒稅。而除舜欽名。同席被斥者十
餘人。皆知名之士。拱辰喜曰。吾一舉綱盡矣。舜欽既
得罪。衍由是不安。求去不許。會諫官錢明逸論仲淹
弼更張綱紀。紛擾國經。凡所推薦。多挾朋黨。陳執中
復譖衍庇二人。帝不悅。遂併黜之。罷知兗州仲淹
知邠州。弼知鄆州。衍清介。有大節。其去也。君子惜之。
爲國者欲求治且安。非天下人和不可也。欲天下和
非中外官司皆和不可也。欲中外官司皆和。非執政

先和不可也。晉唐憲宗相裴度時方鎮跋扈度勸帝用兵諸道叛亂者悉皆歸服憲宗遂成中興之業王室大振旣而悞用李逢吉爲相逢吉大奸邪嫉度功業令門下朋黨號八關十六子者興造謗訕百般中傷以至撰作誣議謂度有天命憲宗旣惑度遂罷去尋致河朔徐汴再陷賊庭王室復弱矣僖宗用鄭畋盧雋爲相爭黃巢邀請節旄事雋以畋語至切遂拂袂投硯而起喧於都下然衆議畋語爲是雋議爲非時又用宰相王鐸爲都統出討黃巢雋大不悅益固執不與巢節旄只授以率府其意欲激黃巢之怒使

功不成以快已志殊不以天下安危爲慮而僖宗
不明終用雋議巢果大怒擁衆百萬自嶺表橫行天
下。是時大亂無一州一縣不用兵者。俄而兩京陷沒
僖宗幸蜀生民塗炭之極自古無比。久之巢雖漸敗
而朱溫自巢軍投來終移唐祚。自彌大梁。茲二相者
營私徇已用心不公擠陷忠良敗壞時政或翦弱王
室或覆亡宗社爲臣至此隕族何償。此臣前謂買禍
召亂爲國大患而不救者之明效也。仁宗初召夏竦
諫官歐陽修蔡襄等交章論竦在陝西畏懦不肯盡
力兼之挾詐任數奸邪傾險陛下孜孜政事首用懷

詐不忠之臣何以求治中丞王拱辰亦言竦經略西
師無功而歸今置諸二府何以厲世因對極論之帝
未省遽起拱辰前引裾畢其說帝乃悟會竦已至國
門言者論益力乞毋令入見右正言余靖言竦累表
引疾及聞召命即兼驛而馳若不早決竦必堅求面
對叙恩感泣復有左右爲之地者則聖聽惑矣章累
上即日詔竦歸鎮拜杜衍爲樞密使竦亦自請還節
鉞徙知亳州竦至亳上書萬言自辯乃徙判并州蔡
襄言于帝曰陛下罷竦而用琦仲淹士大夫賀于朝
庶民歌于路至飲酒叫號以爲懽且退一邪進一賢

豈能關天下輕重哉。蓋一邪退則其類退。一賢進則其類進。衆邪並退。衆賢並進。海內有不泰乎。雖然。臣竊憂之。天下之勢。譬猶病者。陛下旣得良醫矣。信任不疑。非徒愈病。而又壽民。醫雖良。術不得盡用。則病且日深。雖有和扁難責效矣。國子監直講石介篤學尚志。樂善嫉惡。喜聲名。遇事奮然。敢爲會呂夷簡。能相章得象。晏殊。賈昌朝。韓琦。范仲淹。富弼。同時執政。而歐陽修。蔡襄。王素。余靖。並爲諫官。夏竦旣拜復奪之以紆代。因大喜曰。此盛事也。歌頌吾職。其可已乎。作慶曆聖德詩。有曰。衆賢之進。如茅斯拔。大奸之去。

石中
果係

如距斯脫其言大奸蓋斥竦也詩且出孫復聞之曰
介禍始於此矣范仲淹亦謂韓琦曰爲此鬼怪輩壞
事也富弼論
辯正疏

神宗時富弼自汝州入覲詔許肩輿至殿門令其子
掖以進且命毋拜坐語從容訪以治道弼知帝果於
有爲對曰人君好惡不可令人窺測可測則奸人得
以傳會當如天之監人善惡皆所自取然後誅賞隨
之則功罪皆得其實矣又問邊事弼對曰陛下臨御
未久當布德惠願二十年口不言兵帝默然至日昃
乃退欲以集禧觀使留之力辭赴郡至是召拜司空

兼侍中賜甲第悉辭之乃詔以左僕射同平章事時
帝以災變避殿減膳徹樂王安石言災異皆天數非
關人事得失所致弼在道聞之歎曰人君所畏者天
耳若不畏天何事不可爲者此必奸人欲進邪說以
搖上心使輔弼諫諍之臣無所施其功是治亂之機
不可以不速救即上書數千言力論之及入對又曰
君子小人之進退係王道之消長願深加辨察勿以
同異爲喜怒喜怒爲用舍陛下好使人伺察外事故
奸險得志又今中外之務漸有更張此必小人獻說
於陛下也大抵小人惟喜動作生事則其間有所希

覬若朝廷守靜。則事有常法。小人何望哉。願深燭其然。無使有悔。帝欲用安石。唐介言。安石難大任。帝曰。文學不可任。邪經術不可任。邪吏事不可任。邪介對曰。安石好學而泥古。故讓論迂闊。若使爲政。必多所更變。介退。謂曾公亮曰。安石果大用。天下必困擾諸公。當自知之。帝問侍讀孫固曰。安石可相否。固對曰。安石文行甚高。處侍從獻納之職。可矣。宰相自有度。安石狷狹少容。必欲求賢相。呂公著司馬光韓維其人也。帝不以爲然。竟以安石參知政事。謂之曰。人皆不能知卿。以卿但知經術。不曉世務。安石對曰。經術

正所以經世務帝曰然則卿設施以何爲先安石對曰變風俗立法度正方今之所急也帝深納之

嚴叟居言職五年正諫無隱及拜簽樞密謝因進曰太后聽政以來納諫從善務令人心所以朝廷清明天下安靜願信之勿疑守之勿失復進于帝曰陛下今日聖學常深辨邪正正人在朝則朝廷安邪人一進便有不安之象非謂一夫能然蓋其類應之者衆上下蔽蒙不覺養成禍胎爾又曰或聞有以君子小人參用之說告陛下者不知果有之否此乃深誤陛下也自古君子小人無參用之理聖人但云君子在

內小人在外則泰君子在外小人在內則否小人既進君子必引類而去若君子與小人競進則危亡之基也兩宮深然之

晉東晉桓溫之亂諸桓親黨布滿中外及溫死謝安代之爲政以三桓分蒞三州彼此無怨江左遂安故晉史稱安有經遠無競之美然臣切謂謝安之于桓氏亦用之于外而已未嘗引之于內與之共政也向使安引桓氏而寘諸朝人懷異心各欲自行其志則謝安將不能保其身而況安朝廷乎頃者一二大臣專務含養小人爲自便之計既小人內有所主故蔡

確邢恕之流敢出妄言以欺愚惑衆及確恕被罪有司懲前之失凡在外臣寮例蒙摧沮虛來何正臣皆身爲待制而明堂薦于止得選人蒲宗孟曾布所犯明有典法而降旨褫職惟恐不甚明立痕迹以示異同爲朝廷歛怨此二者皆過矣故臣以爲小人雖決不可任以腹心至于牧守四方奔走庶事各隨所長無所偏廢寵祿恩賜常使彼此如一無迹可指此朝廷之至計也

意屬請分
別邪正疏

高太后既崩中外洶洶人懷顧望在位者畏懼莫敢發言翰林學士范祖禹慮小人乘間害政上疏曰陛

下方攬庶政延見羣臣此國家隆替之本社稷安危之機生民休戚之端君子小人進退消長之際天命人心去就離合之時也可不畏哉先后有大功於宗社有大德於生靈九年之間始終如一然羣小怨恨亦不爲少必將以改先帝之政遂先帝之臣爲言以事離間不可不察也唯辨折是非深拒邪說有以奸言惑聽者付之典刑痛懲一人以警羣惡則恬然無事此等既悞先帝又欲悞陛下天下之事豈堪小人再破壞耶時蘇軾方具疏將諫及見祖禹奏曰經世之文也遂附名同進而毀已草疏人不報曾有旨詔

內侍劉瑗等十人復職。祖禹又諫曰：「陛下親政以來，未嘗訪一賢臣，而所召乃先內侍。四海必謂陛下私於近習，不可弗聽。」已而祖禹復請對曰：「熙寧之初，王安石、呂惠卿造立新法，悉變祖宗之政，多引小人以悞國，黜舊之臣，屏棄不用，忠正之士相繼遠引。又用兵開邊，結怨外夷，天下愁苦，百姓流徙，賴先帝覺悟，罷逐兩人，而所引羣小已布滿天下，不可復去。蔡確連起大獄，王韶創取熙和，章惇開五溪，沈起擾交廣，沈括徐禧俞充种諤興造西事，兵民死傷者不下二十萬。先帝臨朝悼悔，謂朝廷不得不任其各以至吳。」

居厚行鐵冶之法于京東。上子京行茶法于福建。蹇周輔行鹽法於江西。李積陛師閔行茶法。市易於西州。劉定教保甲於河北。民皆愁痛嗟怨。比屋思亂。賴陛下與先后起而救之。天下之民如解倒懸。惟是向來所斥逐之人。窺伺事變。妄意陛下不以修改法度爲是。如待至左右。必進奸言。萬一過聽而復用之。臣恐國家自此陵遲不復振矣。

時熙豐用事之臣雖去。其黨分布中外。起私說以搖時政。鴻臚丞常安民貽公著書曰。善觀天下之勢。猶良醫之視疾。方安寧無事之時。語人曰。其後必將有

大憂則衆必駭笑、惟識微見幾之士、然後能逆知其漸、故不憂于可憂、而憂之於無足憂者、至憂也。今日天下之勢、可爲大憂、雖登進忠良、而不能搜致海內之英才、使皆萃于朝、以勝小人、恐端人正士、未得安枕而臥也。故去小人爲不難、而勝小人爲難。陳蕃竇武協心同力、選用名賢、天下想望太平、然卒死、曹節之手、遂成黨錮之禍。張柬之五王中興唐室、以謂慶流萬世、及武三思一得志、至于宸移淪沒、凡此者、皆前世已然之禍也。今怨憤已積、一發其害必大、可不爲大憂乎。公著得書默然。

徽宗時任伯雨初爲右正言半歲之間凡上百八疏大臣畏其多言俾權給事中密諭以少默卽爲真伯雨不聽抗論愈力時曾布欲和訓元祐紹聖之人伯雨言人才固不當分黨與然自古未有君子小人雜然並進可以致治者蓋君子易進小人難退二者並用終於君子盡去小人獨留唐德宗坐此致播遷之禍建中乃其紀躡不可以不戒旣而欲劾曾布覺之徙爲度支員外郎

寧宗時太學生楊宏中與周端朝張道林仲麟蔣傳祿範六人伏闕上書言近者諫官李冰論罷趙汝愚

中外咨憤而李沐以爲父老懼呼蒙蔽天聽一至于此陛下獨不念去歲之事乎人情驚疑變在朝夕是時假非汝愚出死力定大議雖百李沐周知攸濟當國家多難汝愚位樞府奉兵柄指揮操縱何處不可不以此時爲利今上下安妥乃有異意乎章誨李祥楊簡發於中激力辯其非即遭斥逐六館之事拂膺憤怨李沐自知邪正不兩立思欲盡覆正人以便其私必託朋黨以罔陛下之聽臣恐君子小人消長之機於此一判則靖康已然之驗何堪再見於今日邪伏願陛下念汝愚之忠勤察祥簡之非黨灼李沐之

回邪竄沐以謝天下還祥等以收士心疏上詔宏中
等同亂上書煽搖國是悉送五百里外編管

聖王既沒受之者衰君人而不能知立君之道以爲
國本則大臣之贅下而射人心者必多矣君不能審
立其法以爲下制則百姓之立私理而徑於利者必
衆矣管者聖王之治人也不貴其人博學也欲其人
之和同以聽令也秦誓曰紂有臣億萬人亦有億萬
之心武王有臣三千而一心故紂以億萬之心亡武
王以一心存故有國之君苟不能同人心一國威齊
土義通上之治以爲下法則雖有廣地衆民猶不能

以爲安也。君失其道，則大臣比權重，以相舉于國小。臣必循利以相就也。故舉國之士，以爲亡黨行公道，以爲私惠進，則相推於君；退，則相舉於民。各便其身，而忘社稷，以廣其居，聚徒威羣，上以蔽君，下以索民。此皆弱君亂國之道也。故國之危也。

管子法禁篇

孔子曰：性相近也，習相遠也。言嗜惡之本同，而遷染之塗異也。夫刻意則行不肆，牽物則其志流。是以聖人導民，理性裁抑，宕佚慎其所與，節其所偏，雖情品萬區，質文異數，至于陶物振俗，其道一也。叔末澆訛，王道陵闕，而猶假仁以効已，憑義以濟功，舉中於理。

則強梁褫氣片言違正則廝臺解情蓋前哲之遺塵
有足求者霸德既衰狙詐萌起彊者以決勝爲雄弱
者以計劣受屈至有畫半策而縮萬金開一說而錫
琛瑞或起徒步而仕執珪解草衣以升卿相士之飾
巧馳辯以要能釣利者不期而景從矣自是愛尚相
奪與時回變其風不可留其弊不能反及漢祖仗劍
武夫勃興憲令寬賒文禮簡闊緒餘四豪之烈人懷
陵上之心輕死重氣怨惠必讐令行私庭權移匹庶
任俠之方成其俗矣自武帝以後崇尚儒學懷經挾
術所在霧會至有石渠分爭之論黨同伐異之說守

文之徒盛於時矣。至王莽專僞，終篡國祚，忠義之流
耻見纓紱，遂乃榮華丘壑，其足苦槁。雖中興在邇，漢
德重開，而保身懷方，彌相慕襲。去就之節，重於時矣。
逮桓靈之間，主荒政謬，國命委于閹寺。士子羞與爲
伍，故匹夫抗憤，處士橫議，遂乃激揚名聲，互相題拂。
品覈公卿，裁量執政。婞直之風，於斯行矣。夫上好則
下必甚，矯枉故直必過其理，然矣。若范滂、張儉之徒，
清心忌惡，終陷黨議，不其然乎？初，桓帝爲蠡吾侯，受
學于其陵周福。及即帝位，擢福爲尚書。時同郡河南
尹房植有名當朝，鄉人爲之誼曰：「天下規矩，房伯武。」

因師獲印周仲進二家賓客互相機搆遂各樹朋徒
漸成讐隙由是甘陵有南北部黨人之議自此始矣
後汝南太守宗資任功曹范滂南陽太守成瑨亦委
功曹岑暉二郡又爲謠曰汝南太守范孟博南陽宗
資主畫諾南陽太守岑公孝弘農成瑨但坐嘯因此
流言轉入太學諸生三萬餘人郭林宗賈偉節爲其
冠並與李膺陳蕃王暢更相褒重學中語曰天下模
楷李元禮不畏強禦陳仲舉天下俊秀王叔茂又渤海
公族進階扶風魏齊卿並危言深論不隱豪強自
公卿以下莫不畏其貶議屣履到門時河內張成善

窮非一略
一事可成
宜以漸解
故曰漢
軍如風水
之決然無
事也

說風角推占當赦遂教子殺人李膺爲河南尹督促
收捕旣而逢宥獲免膺愈懷憤疾竟案殺之初成以
方伎交通宦官帝亦頗諄其占成弟子牢修因上書
誣告膺等養太學游士交結諸郡生徒更相驅馳共
爲部黨誹訕朝廷疑亂風俗於是天子震怒班下郡
國逮捕黨人布告天下使同忿疾遂收執膺等其辭
連及陳寔之徒二百餘人或遁不獲皆懸金購
募使者四出相望于道明年尚書霍諡城門校尉竇
武並表爲請帝意稍解乃皆赦歸田里禁錮終身而
黨人之名猶書王府自是正直廢放邪枉熾結海內

希風之流遂共相標榜指天下名士爲之稱號上曰
三君次曰八俊次曰八顧次曰八及次曰八厨猶古
之八元八凱也實武劉淑陳蕃爲三君君者言一世
之所宗也李膺荀昱杜密王暢劉祐魏朗趙典朱寓
爲八俊俊者言人之英也郭林宗宗慈巴肅夏馥范
滂尹勳蔡衍牛陟爲八顧顧者言能以德行引人者
也張儉岑暉劉表陳翔孔昱范康檀敷翟超爲八及
及者言其能導人追宗者也度尚張邈王考劉儒胡
毋班秦周蕃鬻主章爲八厨厨者言能以財救人者
也又張儉鄉人朱並承望中常侍侯覽意旨上書言

與其同鄉二十四人別相署彌共爲部黨圖危社稷
其儔及檀彬褚鳳張肅薛蘭馮祐魏玄徐乾爲八俊
田林張隱劉表薛郁王訪劉祇宣靖公緒恭爲八顧
朱楷田繁踈耽薛敦宋布唐龍龐谷宣褒爲八及刻
石立墀共爲部黨而儉爲之魁靈帝詔刊章捕儉等
大長秋曹節因此諷有司奏捕前黨故司空虞放太
僕杜密長樂少府李膺司隸校尉朱寓潁川太守巴
肅沛相荀昱河內太守魏朗山陽太守翟超任城相
劉儒太尉掾范滂等百餘人皆死獄中餘或先沒不
及或亡命獲免自此諸爲怨隙者因相陷害睚眦之

忿濫入黨中又州郡承旨或有未嘗交關亦罹禍毒其死徙廢禁者六七百人熹平五年永昌太守曹鸞上書大訟黨人言甚方切帝省奏大怒即詔司隸益州檻車收鸞送槐里獄掠殺之于是又詔州郡更考黨人門生故吏父子兄弟其在位者免官禁錮爰及五屬光和二年上祿長和海上言禮從祖兄弟別居異財恩義已輕服屬疎末而今黨人錮及五族既乖典訓之文有繆經常之法帝覽而悟之黨錮自從祖以下皆得解釋中平元年黃巾賊起中常侍呂疆言於帝曰黨錮久積人情多怨若久不赦宥輕與張角

令謀爲變。滋大悔之。無救。帝懼其言。乃大赦黨人。詔徙之家皆歸故郡。其後黃巾遂盛。朝野崩離。綱紀文事蕩然矣。凡黨事始自其陵汝南成於李膺張儉海內塗炭二十餘年。諸所蔓衍皆天下善士三君八俊等三十五人。其名迹存者並載乎篇。

范曄黨錮傳論

李德裕吉甫之子也。以中書舍人李宗閔嘗對策議切其父恨之。宗閔又與翰林學士元稹爭進取有隙。右補闕楊汝士與禮部侍郎錢徽掌貢舉。西川節度使段文昌翰林學士李紳各以書屬所善進士於徽。及薦出文昌紳所屬皆不預焉。及第者鄭朗覃之弟。

裴謨度之子蘇巢宗閔之壻楊殷士汝士之弟也文
昌言于穆宗曰今歲禮部殊不公所取進士皆子弟
無統以關節得之穆宗以問諸學士穆德裕紳皆曰
誠如文昌言穆宗乃命中書舍人王起等覆試詔黜
朗等十人貶徽江州刺史宗閔劍州刺史汝士開江
令或勸徽奏文昌紳屬書上必寤徽曰苟無愧心得
喪一致奈何奏人私書豈士君子所爲邪取而焚之
時人多之自是德裕宗閔各分朋黨更相傾軋垂四

十年

敬宗即位逢吉與其黨快紳失勢又恐敬宗復用之

以此附光

日夜謀議思所以害紳者楚州刺史蘇遇謂逢吉之
黨曰主上初聽政必開延英有次對官惟此可防其
黨以爲然亟白逢吉曰事迫矣若俟聽政悔不可追
逢吉乃令王守澄言於敬宗曰陛下所以爲儲貳臣
備知之皆逢吉之力也如杜元穎李紳輩皆欲立深
王度支負外郎李續之等繼上章言之敬宗時年十
六疑未信會逢吉亦有奏言紳謀不稱於上請加貶
謫敬宗猶再三覆問然後從之貶紳爲端州司馬逢
吉仍帥百官表賀張又新等猶忌紳日上書言貶紳
大輕敬宗許爲殺之朝臣莫敢言獨翰林侍讀學士

韋處厚上疏指述紳爲逢吉之黨所讒人情嘆駭紳
蒙先朝獎用僭使有罪猶宜容假以成三年無改之
孝况無罪乎於是敬宗稍開寤會閣禁中文書有穆
宗所封一篋發之得裴度杜元穎李紳疏請立敬宗
爲太子敬宗乃嗟嘆悉焚人所上譖紳書雖未即召
還後有言者不復聽矣

文宗與李德裕論朋黨事德裕對曰方今朝士三分
之一爲朋黨時給事中楊虞卿與從兄中書舍人汝
士弟戶部郎中漢公中書舍人張元本給事中蕭澣
等善交結依附權要上下執政下曉有司爲士入求

言多利弊無不如志。文宗聞而惡之。故與德裕言首
之。德裕因得以排其所不悅者。

武宗之立。非宰相意。故楊嗣復李珣相繼罷去。召淮
南節度使李德裕入朝。至京師。以德裕同平章事。德
裕入謝。言於武宗曰。致理之要在於辨羣臣之邪正。
夫邪正二者。勢不相容。正人指邪人爲邪。邪人亦指
正人爲邪。人主辨之甚難。臣以爲正人如松柏。特立
不倚。邪人如藤蘿。非附他物不能自起。故正人一心
事君。而邪人競爲朋黨。先帝深知朋黨之患。然所用
卒皆朋黨之人。良由執心不定。故姦邪得乘間而入。

也夫宰相不能人人忠良或爲欺罔主心始疑於是
旁詢小臣以察執政如德宗末年所聽任者惟裴延
齡輩宰相署勅而已此政事所以日亂也陛下誠能
慎擇賢才以爲宰相有奸罔者立黜去之常令政事
皆出中書推心委任堅定不移則天下何憂不理哉
武宗嘉祐之

初仲淹之貶饒州修及尹洙余靖皆以直仲淹見
是輩異目之曰黨人於是朋黨之論起修乃進朋黨
論以爲君子以同道爲朋小人以同利爲朋皆自然
之理也然小人無朋惟君子則有之蓋小人所好者

利祿所貪者財貨當其同利之時暫相黨引以爲朋者僞也及其見利而爭先或相盡而反相賊害雖兄弟親戚不能相保君子則不然所守者道義所行者忠信所惜者名節以之修身則同道而相益以之事國則同心而共濟終始如一故爲君者但當退小人之僞朋用君子之眞朋則天下治矣修論事切直人視之如仇帝獨獎其敢言顧侍臣曰如歐陽修者何處得來

滕甫同修起居注帝召問治亂之道對曰治亂之道如黑白東西所以變色易位者朋黨汨之也帝曰卿

知君子小人之黨乎曰君子無黨譬之草木綱繆相附者必蔓草非松柏也朝廷無朋黨雖中主可以濟不然雖上聖亦殆帝以爲名言乃以翰林學士知開封府甫在帝前論事如家人父子言無文飾洞見肺腑帝知其誠蓋事無巨細人無親疎輒皆問之甫隨事解答不少嫌隱王安石嘗與甫同考試語言不相能深惡甫會議新法恐甫言而帝信之因極力排甫

知鄆州

宗時程顥在經筵以禮法自持每進講色甚莊繼以蘇軾謂其不近人情深嫉之每加玩侮於是

門人右司諫賈易左正言朱光廷等積不能平劾
試館職策問謗訕殿中侍御史呂陶言臺諫當徇
至公不可假借事權以報私隙右司諫王覲言軾命
辭失輕重其事小不足考若悉考同異深寃嫌疑則
兩岐遂分使士大夫有朋黨之名大患也太后然之
范純仁亦言軾無罪遂置不問會帝患瘡疹不出願
請宰臣問知否且曰上不御殿太后不當獨坐人主
有疾而大臣可不知乎翌日宰臣以願言問疾由是
大臣亦多不悅御史中丞胡宗愈左諫議大夫孔文
仲給事中顧臨遂連章力詆願不宜在經筵乃罷願

出管勾西京國子監時呂公著獨當國羣賢咸在朝
不能不以類相從遂有洛黨蜀黨朔黨之語洛黨以
頤爲首而朱光廷賈易爲輔蜀黨以蘇軾爲首而呂
陶等爲輔朔黨以劉摯梁宗王巖叟劉安世爲首而
輔之者尤衆是時熙豐用事之臣退休散地怨入骨
髓陰伺間隙而諸賢不悟名爲黨比以相訾議惟呂
大防秦人慙直無黨范祖禹師司馬光不立黨旣而
帝聞之以問胡宗愈宗愈對曰君子指小人爲奸則
小人指君子爲黨陛下能擇中立之士而用之則黨
鵷鴻矣因具君子無黨論以進

黃復張商英上官均來之邵等交章論司馬光等變
更先朝之法畔道逆理章惇蔡卞請發光公著塚斷
棺暴尸哲宗問許將將對曰此非盛德事也乃止於
是追奪光公著贈謚卞所立碑奪王巖叟贈官貶呂
大防爲秘書監摯爲光祿卿轍爲少府監並分司南
京初李清臣冀爲相首倡紹述之說以計去蘇轍范
純仁亟復青苗免役法及章惇至心甚不悅復與爲
異惇旣貶司馬光等又籍文彥博以下三十人將悉
竄嶺表清臣進曰更先帝法度不能無過然皆累朝
元老若從惇言必大駭物聽帝乃下詔曰大臣朋黨

司馬光以下各以輕重議罰其布告天下餘悉不問
議者亦勿復言初朋黨論起帝曰梁燾每起中正之
論其開陳排擊盡出公議朕嘗記之又曰蘇頌知君
臣之義無輕議也由是頌獲免而燾止謫提舉舒州
靈仙觀學語諸子曰上用章惇吾且得罪若惇顧國
事不遷怒百姓但責吾曹死無所恨正慮意在報復
法令益峻奈天下何

念及百姓
也又可愛
耶

呂大防朴厚恣直純仁務以博大開上意忠厚華士
風二人同心戮力以相王室太后復盡心委之故元
祐之治比隆嘉祐時黨論方起純仁慮之會右諫議

大夫王覲以胡宗愈進君子無黨論惡之因疏宗愈不可執政太后大怒純仁與文彥博呂公著辯於簾前太后意未解純仁曰朝臣本無黨但善惡邪正各以類分彥博公著皆累朝舊人豈容雷同罔上咎先臣與韓琦富弼同慶曆柄任各舉所知當時飛語指爲朋黨三人相繼補外造謗者公相慶曰一網打盡矣此事未遠願陛下戒之因極言前世朋黨之禍并錄歐陽修朋黨論上之然竟出覲知潤州而宗愈居位如故

徽宗時江公望上疏言自先帝有紹述之意輔政非

其人以媚於己爲同忠於君爲異借威柄以快私隙使天下騷然泰陵不得盡繼述之美元祐人才皆出於熙豐培養之餘遭紹聖竄逐之後存者無幾矣神考與元祐之臣其先非有射鉤斬祛之隙也先帝信仇人而黜之陛下若立元祐爲名必有元豐紹聖爲之對有對則爭興爭興則黨復立矣陛下改元詔旨亦稱思建皇極端好惡以示人本中和而立政皇天后土實聞斯言今若淪之奈皇天后土何帝嘗以示范純禮純禮贊之乞褒遷公望以勸來者曾蔡王府相告有不遜語及於王公望乞勿以無根之言加諸

至親遂坐罷

時元祐元符末，華賢貶竄，死者略盡。蔡京猶未愜意，乃與其客強浚明、葉夢得、龔宰執、司馬光、文彥博、呂公著、呂大防、劉摯、范純仁、韓忠彥、王珪、梁燾、王巖叟、王存、鄭雍、傅堯俞、趙鼎、韓維、孫固、范百祿、胡宗愈、李清臣、蘇轍、劉奉世、范純禮、安燾、陸佃，曾任待制以上官，蘇軾、范祖禹、孔文仲、孔武仲、朱光廷、孫覺、鮮于侁、賈易、鄒浩等餘官，程頤、秦觀、張耒、晁補之、黃庭堅、孔平仲等內臣，張士良等武臣，王獻可等凡百二十人等，其罪狀謂之奸黨，請御書刻石於端禮門。京等

復請下詔藉元符末日食求言章疏及熙寧紹聖之
政者付中書定爲正上正中正下三等邪上邪中邪
下三等於是鍾世美以下四十一人爲正等悉加旌
擢鄧考甫以下五百餘人爲邪等降責有差又詔降
責人不得同州居住

蔡京又自書奸黨爲大碑頒於郡縣令監司長吏廳
皆刻石有長安石工安民當鐫字辭曰民愚人固不
知立碑之意但如司馬相公者海內稱其正直今謂
之奸邪民不忍刻也府官怒欲加之罪民泣曰被役
不敢辭乞免鐫安民二字於石末恐得罪後世聞者

懷之

論五德則
加爲無權

孝宗謂葉衡等曰。朝廷用人止論其賢否。如何不可。有黨如唐之牛李。其黨相攻四十年不解。皆緣主聽不明。所以至此。文宗乃言去河北賊。易去朝中朋黨。難。朕常笑之。爲人主者。但公是公非。何緣有黨。又曰。近來士大夫好倡爲清議。此語一出。切恐相師成風。便以趨事赴功者爲猥俗。以矯激沽譽者爲清高。駁駁不已。如東漢激成黨錮之風。深害治體。豈可不戒。卿等宜書諸紳。

光宗時。劉光祖入對。言近世是非不明。則邪正互攻。

公論不立則私情交起此固道之消長時之否泰而實爲國家之禍福祉稷之存亡甚可畏也本朝士大夫學術最爲近古初非有強國之術而國勢尊安根本深厚咸平景德之間道臻皇極治保太和至於慶曆嘉祐盛矣不幸而壞於熙豐之邪說踈弃正士招徠小人幸而元祐君子起而救之末流大分事故反覆紹聖元符之際羣凶得志絕滅綱常其論既勝其勢旣成崇觀而下尚復何言臣始至時聞有譏貶道學之說而實未睹朋黨之分逮臣復來則朋黨已成而忠諫者獲罪矣夫以忠諫爲罪其去紹聖幾何陛

丁卽位之初凡所進退率用人言初無好惡之私豈
以黨偏爲主而一歲之內逐者紛紛往往推忠之言
謂爲沽名之舉至於潔身以進亦曰憤懣而然欲激
怒於至尊必加之以訐訕臣欲熄將來之禍故不憚
反覆以陳伏冀聖心豁然永爲皇極之主使是非由
此而定邪正由此而別公論由此而明私意由此而
熄道學之譏由此而消朋黨之迹由此而泯和平之
福由此而集國家之事由此而理則生靈之幸社稷
之福也不然相激相勝展轉反覆爲禍無窮臣實未
知稅駕之所帝下其章讀者至於流涕河澹見之數

日恍惚無措。是年廷試舉人。婺州進士王介策亦言。今之所謂道學者。即世之君子正士也。君子正士之名。不可遂故設爲此名。一網去之。聖明在上。而天下以道學爲諱。將何以立國哉。帝嘉歎。擢爲第三。由是道學之譏少沮。

詔僞學之黨。宰執權任進擬。自是學禁愈急。大理司直邵泉然言。三十年來。僞學顯行。場屋之權。盡歸其黨。乞詔大臣審察其所學。詔僞學之黨勿除。在內差遣已而言者。又論僞學之禍。乞監元祐調停之說。杜其根源。遂有詔監司帥守薦舉改官。並於奏牘前聲

說非僞學之人會鄉試漕司前期取家狀必令書以不是僞學五字撫州推官柴中行獨申漕司云自勿習易讀程氏易傳未委是與不是僞學如以爲僞不願考校士論壯之

孝宗以周必大爲翰林學士幾六年制命溫雅周盡事情爲一時詞臣之冠及拜參政帝謂之曰執政于宰相固當和而不同前此宰相議事執政更無語何也必大對曰大臣自應互相可否自秦檜當國執政不敢措一辭後遂以爲常然陛下虛心無我人臣乃欲自是乎惟小事不敢有隱則大事何由蔽欺帝深

然之

制官

宋初承唐制三省無專職臺省寺監亦無定員類以他官主判三省長官不預朝政六曹不釐本務給舍不領本職諫議無言責起居不記注司諫正言非特官世職亦不任諫諍其官人受授之別有官有職有差遣凡仕者以登臺閣升禁從爲顯官而不以官之遲速爲榮滯以差遣要劇爲貴途而不以階勲爵邑有無爲輕重議者多以正名爲請神宗慨然欲更其制乃置詳定官制局于中書命翰林學士張璪樞密副承旨張誠一領之

先定官制下詔行之凡領空名者一切罷去而易之以階因以寄祿議者又欲罷樞密院歸兵部神宗曰祖宗不以兵柄歸有司故專命官以統之互相維制何可廢也遂止嘗謂執政曰官制將行欲新舊人兩用指御史大夫曰非司馬光不可王珪蔡確相顧失色珪憂甚不知所出確曰上久欲收靈武公能任責則相位可保也珪喜謝之因薦俞允帥慶使上平西夏策其意以爲旣用兵深入必不召光雖召將不至已而光果不召

臣聞治軍無禮則威嚴不行禮者上下之分是也唐

自肅代以降，務行姑息之政，是以藩鎮跋扈，威侮朝廷，士卒驕橫，侵逼主帥，上陵下替，無復綱紀。以至五代，天下大亂，運祚迫蹙，生民塗炭，祖宗受天景命，聖德聰明，知天下之亂生於無禮也，乃立軍前之制曰：一階一級，全歸伏事之儀，敢有違犯罪，至於死。於是上至都指揮使，下至押官長行，等秩相承，粲然有叙。若身之使臂，臂之使指，莫敢不從，故能東征西伐，削平海內，爲子孫建久大之業。至今百有餘年，天下太平者，皆由此道也。近歲以來，中外主兵臣僚，徃徃不識大體，好施小惠，以盜虛名。軍中有犯階級者，務行

食是致軍校大率不敢鈐束長行耳言悅色曲加
煦嫗以至懦怯兵官亦爲此態遂使行伍之間驕恣
悖慢寢不可制上畏其下尊制於卑所謂下陵上替
者無過於此臣聞聖王刑期於無刑今寬貸犯階級
之人明活一人之命殊不知軍法不立漸成陵替之
風則所繫乃億兆人之命也臣愚欲望陛下特降詔
旨申明明階級之法戒勅中外主兵臣僚令一遵祖宗
之制如敢有輒行寬貸曲收衆心者嚴加罪罰以警
其餘庶幾綱紀復振基緒永安

司馬光論
階級疏

有唐正觀之風最爲稱首于時封疆甚廣經費尤多

亦不聞別分利權。特創使額。而軍須取足。玄宗侈心
既萌。貪地不已。北事奚契丹。南征閣羅鳳。召發既廣。
租調不充。於是蕭景楊釗始以地官判度支。而宇文
融爲租調地稅使。雖利孔始開。禍階將構。然版籍根
本尚在。南宮肅代物力蕭然。於是有司之職盡廢。而
言利之臣攘臂於其間矣。征税多端。本于專置使額。
故德宗之初。首降詔書。追行古制。天下錢穀皆歸文
昌。咸謂故事復興。太平可致。而天未悔禍。叛亂相仍。
經費不充。使額又建。於是裴延齡以利誘君。甚於前
矣。憲穆而下。或迫於軍期。切於國計。用救當時之急。

率以權宜裁之。五代短促，曾莫是思。國家三聖相承，五兵不試，太平之業垂統，立制在茲辰也。所宜三部使額還之六卿，今莫若精擇戶部尚書一人，專掌鹽鐵使事，俾金部郎中員外分判之。又擇本部侍郎二人，分掌度支、戶部使事，各以本曹郎中員外分判之。則三使判官，雖省猶不省也。仍命左右司郎中員外總知帳目，分勾稽違。孫何論官制疏

漢之宗臣，蕭何爲丞相，漢儀丞相進，天子御座爲起，在輿爲下，有疾法駕至第問，得戮二千石，申屠嘉欲斬內史，晁錯是也。霍光受顧託之重，當伊周之地，廢

昌邑王上表太后丞相臣敞爲首大司馬大將軍臣
光次之其尊崇如此中間常置左右丞相亦嘗改爲
相國亦爲大司徒大抵漢之丞相是爲三公于天下
無所不統後漢亦以三公爲宰相則司徒本西漢丞
相也其後或爲丞相或爲相國或爲大丞相雖互爲
之名其實一也曹公司馬師昭趙王倫王敦王導劉
義宣齊高帝梁武帝爾朱榮陳武帝侯景齊獻武隋
文帝皆爲之歷代多非尋常人臣之職亦多爲贈官
然自秦以降實居百寮之長今尚書令統領衆務提
舉綱目僕射貳之誠爲崇重且非統國政宰天下之

宜侍中中書令如直以尊崇則太師不然上公太尉始可師長命百寮也龍朔中天寶初嘗改侍中中書令爲左右相遠協伊尹仲虺爲左右相周公召公奭成王爲左右之義斯誠允當或謂尚書令僕射則錄尚書之職是官之師長按前代錄尚書霍光張安世王鳳趙喜牟融鄧彪張禹李固王導褚彥回齊明帝之徒或是三師或三公或是大司馬大將軍兼之皆秉朝政猶古冢宰百官總已實宰輔也其時別自有令僕今僕射雖嘗改爲丞相名同而職異品秩又未崇極上有三師三公尚書令豈比前代丞相受任

也其襲舊名無實者若今刺史皆云使持節按前代使持節得戮二千石其王公已下封國皆南面臣人分茅建社其開府儀同三司則禮數班秩皆如三公置府辟吏今並豈有其實乎此例甚不能遍舉安有僕射因改丞相之名都無丞相之實而爲百寮之師長也又與丞郎絕禮若隔品致敬則諸司長官與隔品寮屬其可絕禮乎斯不然矣

僕射議

晉孔融疾曹操專法漢王室寡弱於是建議欲復古千里之制不以封建操遂惡融終於害之然此本由漢家制度無法不稽古爾設今京師諸侯素有分限

則強臣何由回緣以黜陟今朝廷甫欲建設近輔周
衛都內誠不宜復存五州節制之號以開後世諸侯
因緣封建之萌漢武本置三輔皆治長安中非不知
鼎立千里之內爲便也其意乃實不欲使億兆之衆
偏有所分而已及唐雖以同華爲二輔各自一郡然
猶不立軍額者皆方面征鎮當一道者也臣謂今日
事體固當法之忠武彰化等軍額盡可停罷獨存其
州名於理爲允

劉敞論輔
郡節制議

舊平章事遷中書令國朝以來未有遷至中書令者
而今儀同三司一階兼管日宰相累遷之官舊禮部

尚書遷戶部、工部、遷刑部、刑部遷兵部、而今銀青光祿大夫一階兼管日尚書累遷之官、舊禮部侍郎遷戶部、戶部遷吏部、工部侍郎遷刑部、刑部遷兵部、而今正議大夫一階兼管日侍郎累遷之官、卿寺亦然、管之官品難於進、今之階秩易爲高而又降七品爲八品、降五品爲六品、降三品爲四品、至其不可用也、則議請減蔭、反以舊品爲定而章服之、今徒降五爲六、降三爲四、以遷就新品之失、而不知義理之所在、則所謂非漢唐之舊、而不合今日之務者、可驗於此、然猶未有害也、舊尚書省不總天下之政、而中書門

下合而爲一、則其治速、今尚書省總天下之政、中書門下析而爲二、則其治緩、此理之固然者、至所謂畫黃錄符牒關刺、由上而下、復由下而上、近者浹旬、遠者累月、有夜半停印待報、而其務乃止於竹茹木屑之細、或者補衣貸食、未得其失、而事久失於期會、則非惟不合今日之務、而良有害公卿大夫、所以不擇於官制者、以此亦在上之人損益之而已矣、蓋隋唐二十有九、而今寄祿階二十有五、如益其階、所與舊日之官品相對、無併三遷、兩遷而爲一階、則階正矣、還舊日之品秩、凡議請減蔭服章之名、必合三五

七九之數無易前古之常以就新品之失則品正矣
事大而變則由寺監而上臺省或由臺省而下寺監
事速而小者則許之專決或專達而不爲次第上下
之道久則事正矣階正則朝廷尊名器重品正則義
理安民志定事正則三省無滯務而遠近之人皆不
失於期會修此三者而官制立矣

單仲芳
官制議

蔡京率意自用欲更制官名以繼元豐之政乃首更
開封守臣爲尹牧由是府分六曹縣分六案內侍省
職悉倣機廷之躰修六尚局建三衛郎遂詔太師太
傅太保古三公之官今爲三師古無此稱合依三代

三公爲宰相之任。司徒司空周六卿之官。太尉秦
主兵之任。皆非三公。並宜罷。仍立三孤爲次相之任。
更侍中爲左輔。中書令爲右弼。尚書左僕射爲太宰。
兼門下侍郎。右僕射爲少宰。兼中書侍郎。罷尚書令。
及文武勲官。而以太尉冠武階。然是時員旣濫冗。名
且紊雜。甚者走馬承受。升擁使華。黃冠道流。亦濫朝
品。元豐之制。至此大壞。

蒙古自鐵木真已來。諸事草創。設官甚簡。以斷事官
爲至重之任。位三公上。丞相謂之大必閣赤。掌兵柄
則左右萬戶而已。後稍倣金制。置行省及元帥宣撫

等官忽必烈既立大新制作遂命劉秉忠許衡酌古今之宜定內外官制其總政務者曰中書省秉兵柄者曰樞密院司黜陟者曰御史臺其次內則有寺監院司衛府外則有行省行臺宣慰廉訪其牧民則有路府州縣官有常職位有常員食有常祿其長則蒙古人爲之而漢人南人貳焉於是—代之制始備晉武帝詔問朝臣以政之損益司徒左長史傅咸上書以爲公私不足由設官太多舊都督有四今并監軍乃盈於十禹分九州今之刺史幾向一倍戶口比漢十分之一而置郡縣更多虛立軍府動有百數而

無益宿衛五等諸侯坐置官屬諸所廩給皆出百姓
此其所以困乏者也當今之急在於并官息役上下
務農而已時又議省州郡縣半吏以赴農功中書監
荀勗以爲省吏不如省官省官不如省事省事不如
清心晉蕭曹相漢載其清靜民以寧壹所謂清心也
抑浮說簡文案略細苛宥小失有好變常以徼利者
必行其誅所謂省事也以九寺併尚書蘭臺付三府
所謂省官也若直作大例凡天下之吏皆減其半恐
文武衆官郡國職業劇易不同不可以一槩施之若
有曠闕皆須更復或激而滋繁亦不可不重也

知大體之言

李泌請復所減州縣官德宗曰置吏以爲人也今戶口減於承平之時三分之二而吏員更增可乎對曰戶口雖減而事多於承平且十倍吏得無增乎且所減皆有職事而冗官不減此所以爲未當也至德以來置額外官敵正官三分之一若聽使計日得資然後停加兩選授同類正員官如此則不惟不怨兼使之喜矣又請諸王未出閣者不除府官上皆從之詔先所減官並宜復故

李吉甫奏自漢至隋十有三代設官之多無如國家者天寶以後中原宿兵見在可計者八十餘萬其餘

平買僧道不服田賦者什有五六是常以三分勞
於苦骨之人奉七分待衣坐食之輩也今內外官以
稅錢給俸者不下萬員天下三百餘縣或以一縣之
地而爲州一鄉之民而爲縣者甚衆請勅有司詳定
廢置吏員可省者省之州縣可併者併之入仕之塗
可減者減之

治天下者如治家凡民之家隨其富貧視其族屬幾
何一歲之費幾何賓客之資公上之須復用幾何度
其家之所入然後量力而出之如是乃可以爲家計
也不如是其家無以自給樞府不知財用日月添兵

而財用有無不知也三司使守藏吏也歲了一歲便
爲辦事不幸有邊境之急必取於民譬之家計是不
度所入不量所出國不富實陛下未得高枕而優游
臣故謂兵爲大其次又有官冗今且以轉官一事言
之太祖太宗朝仕官者或有功勞或有民譽則拔任
其人人莫不勸然以孤遠守常之人湮沉不遷者有
之真宗設三年磨勘之法然後孤遠守常之人與夫
權要圖進之士無異也日月既久漸以成俗雖有長
材異能出衆人者有小過累未可遷也偶能飲食言
語於人無忤者數月必遷此三年一遷之法今爲大

官守

弊也祖宗時卿監郎中無一缺人觀今班簿姓名可見也天下州軍三百餘處各入知州軍凡軍幾何人局少員多每至除待闕須一二年通判知縣之類率皆如此真宗時選人磨勘有遷京官者有不遷者仁宗時但無過咎無不轉官官冗如此可不思變更之術哉去冗百端此二者最大願陛下熟思之漸求消冗之說

宋蔡襄
法冗策

司馬光論張方平不協物望難居政府神宗不從命徙光翰林知通進銀臺司呂公著封還除目曰光以舉職賜罷是爲有言責者不得盡其言也詔以告直

付閣門公著又言制命不由門下則封駁之職因臣而廢願正臣罪乞解銀臺司不報未幾方平以父喪亦罷方平慷慨有氣節平居未嘗以言徇物以色假人所至有政績然乏公輔之望

唐王委蕭瑀以庶政事無大小莫不關掌瑀亦孜孜盡力繩違舉過人皆憚而畏之瑀終不自理嘗有勅不時宣行唐王責之瑀對曰大業之世內史宣勅或前後相違有司不知所之今王業經始事繁安危故臣每受一勅必勘審使與前勅不違始敢宣行稽緩之意實由於此唐王曰卿用心如此吾復何憂

夫欲用天下之智力者莫若使天下信之也商鞅移木豈禮也哉有山而然自經荒蕪綱紀頽陵清直之風旣澆糟粕之俗猶在誠宜濯以滄浪之流灑以吞舟之網則幽顯明別於變時雍矣弘濟茲務在乎官人今南北雜錯屬託者無保負之累而輕舉所知此博采所以未精職理所以多闕今凡有所用宜隨其能不而與舉主同乎褒貶則人有慎舉之恭官無廢職之吝晉冀缺有功胥臣蒙先茅之賞子玉敗軍子文受薦賈之責古既有之今亦然漢朝使刺史行部乘傳奏事猶恐不足以辨彰幽明弘宣政道故復

有繡衣直指。今之艱弊。過于往。晉宜分遣黃散。若中書郎等。循行天下。觀採得失。舉善彈違。斷截苟且。則人不敢爲非矣。漢宣帝時。二千石有居職修明者。則人爲公卿。其不稱職。免官者。皆還爲平人。懲勸必行。故歷世長久。中間以來。遷不足。競免不足。思或有進而失意退。而得分蒞官。雖美當以素論降替。在職實劣。直以舊望登叙。校游談爲多少。不以實事爲先後。以此責成。臣未見其兆也。今宜峻左降舊制。可二千石免官三年。乃得叙用。長吏六年。戶口折半。道里倍之。此法必明。使天下知官難得而易失。必人慎其職。

朝無情官矣都督可課佃二十頃州十頃郡五頃縣
三頃皆取文武吏醫卜不得撓亂百姓三臺九府中
外諸軍有可減損皆令附農市息未伎道無游人不
過一熟豐穰可必然後重居職之俸使祿足以代耕
頃大事之後遐邇皆想宏略而寂然未副宜早振綱

領肅起羣望

應詹為江州刺史將行上疏

知足下遣十五議曹各之一縣又吏假歸白所聞見
誠是足下留意百姓故廣其視聽吾謂勸導以實不
以文十五議曹欲何所敷宣邪庶事辭訟足下聽斷
允塞則物理足矣上有理務之心則下之求理者至

矣。日晏省覽。廢事無滯。則吏愼其負。而人聽不惑。豈
須邑至里。詰飾其游聲哉。非徒不足致益。乃是蠶魚
之所資。又不可縱小吏爲耳目也。豈有善人君子而
干非其事。多所告白者乎。君子之心。誰毀誰譽。如有
所譽。必由歷試。如有所毀。必以著明。託社之鼠政之
甚害。自古以來。欲爲左右耳目者。無非小人。皆先因
小忠而成其大不忠。先藉小信而成其大不信。遂使
君子道消。善人與尸。前史所書。可爲深鑒。足下選綱
紀。必得國士。足以攝諸曹。諸曹皆是良吏。則足以掌
文按。又擇公方之人。以爲監司。則清濁能否與事而

明足下但平心居宗何取于耳目哉晉明德馬后未嘗顧與左右言可謂遠識矣大丈夫而不能免此乎

豫章太守范滂欲遣十五歲弟下屬城採求風政并吏假還詔問官長得失徐選與滂書

唐太宗時馬周上疏言百姓所以治安唯在刺史縣令苟選用得人則陛下可以端拱無爲今朝廷唯重內官而輕州縣之選刺史多用武人或京官不稱職始補外任邊遠之處用人更輕所以百姓未安殆由於此疏奏太宗稱善久之謂侍臣曰刺史朕當自選縣令宜詔京官五品已上各舉一人

玄宗時韋玢奏郎官多不舉職請沙汰授他官玢

尋出爲刺史宰相奏擬冀州救改小州姚崇奏臺郎寬怠及不稱職玠請沙汰乃是奉公臺郎甫爾改官玠即貶黜於外議者皆謂郎官謫傷臣恐後來左右丞指以爲戒則省事何從而舉矣乃除冀州刺史臣竊以爲今省府之重其擇人宜精其任人宜久凡今之弊皆不精不久之故何則天下之賢者不可以多得而賢者之中求其治繁者又不可以人人而能也幸而有一人焉又不久而去夫世之君子苟有志於天下而欲爲長遠之計者則其效不可以朝夕見其始若迂濶而其終必將有所可觀今期月不報改

則朝廷以爲是無能爲者不待其成而去之而然見稱於人者又以爲有功而擢爲兩府然則是爲省府者能與不能皆不得久也夫以省府之繁終歲不得休息朝廷旣以汲汲而去之而其人亦莫不汲汲而求去夫胥吏者皆老於其局長子孫於其中以汲汲求去之人而御長子孫之吏此其相視如客主之勢宜其奸弊不可得而去也省府之位不爲卑矣苟有能者而老於此不爲不用也古之用人者知其久勞於位則時有以賜予勸獎之以厲其心不聞其驟遷以奪其成效今天下之吏縱未能一槩久而不

遷至於府亦不可以倉卒而去更知其久居而不
去也則其欺詐固已少衰矣而其人亦得深思熟慮
周旋於其間不過十年將必有卓然可觀者也

度原

八編類纂卷之二十四

大學衍義補

戶曹類

固邦本

總論固本之道

和帝時魯恭上疏曰萬民者天之所生天愛其所生猶父母愛其子一物有不得其所者則天氣爲之舛錯况於人乎故愛民者必有天報

唐太宗時馬周上疏曰三代及漢歷年多者八百少者不減四百良以恩結人心人不能忘故也自是以降多者六十年少者纔二十餘年皆無恩於人本根

不固故也臣觀自古百姓愁怨國未有不亡者人主當修之於可修之時不可悔之於既失之後

蕃民之生

周禮大司徒之職掌建邦之土地之圖與其人民之

數以佐王安擾邦國以天下土地之圖周知九州

豫青兗雍之地域廣橫也東輪縱也南之數辨其山

積石竹林川江澤水鍾丘土高陵大阜墳水涯

行下平原高平隰下濕之名物十等之名與

又曰以土宜之法辨十有二土之名物謂十二分野

宜辨其名稱謂白壤黑墳以相古視民宅而知其利害

之類物謂所生之物

以阜猶盛也人民以蕃息也鳥獸以育生也草木以任就地所生也

因民所能土事辨十有二壤亦土也之物而知其種以教稼

稽樹藝

大司徒以保息謂安其民而撫養萬民一曰慈幼謂愛

幼二曰養老七十養於鄉三曰振窮閭閻其無告四曰恤貧助其不給

五曰寬疾略其事任保其正命六曰安富保其常產

小司寇及大比三年比較民之衆寡登民數自生齒以上登載也

于天府內史司會冢宰貳之以制國用

臣按人生齒而體備男子八月生齒八歲而齔

女子七月生齒七歲而齔皆書于版其正本登

于天府其內史司會冢宰三官所掌者乃其副
貳耳民數既登之後乃計其數以制國用焉始
之內史以書其名繼之司會以計其數終之冢
宰以統其成蓋因其戶口之多少年齒之長幼
以會計其用度之盈縮以見先王之舉事無非
所以爲民民用既足自可以制國用不厲民以
自適也

司民

計民數者

掌登萬民之數自生齒以上皆書于版籍

辨其國中

王國之內

與其都鄙及其郊野異其男女歲登

上下除其死生

每歲有生者登而載之死者去而除之

及三年大比以

萬民之數。詔司寇司寇及孟冬祀司民之日。祀司民之星獻其數于王。王拜受之。登于天府。內史司會冢宰貳之以贊王治。

漢惠帝六年令民女子年十五以上至三十不嫁五

算。

漢律人出一算令
人出五算罪之也

章帝元和二年春正月詔賜民胎養穀著爲令。詔曰：諸懷妊者賜胎養穀。人三斛。復其夫勿算一歲。三年春正月詔嬰兒無親屬者及有子不能養者廩給之。

臣按漢之時去古未遠所以著之詔令以惠愛

元元以蕃其生者。猶有古意。女子過時不嫁者。有罪。婦人懷妊者。有養。嬰兒失養者。有給。三代以下。漢祚所以獨長。旣失而復得者。豈不以此哉。

孝景元年詔曰。間者歲比不登。民多乏食。天絕天年。朕甚痛之。郡國或磽陁。無所農桑。繫畜或地饒廣。草莽水泉利而不得徙。其議民欲徙寬大地者。聽之。崔寔曰。昔聖人分口耦耕地。各相副。今青徐兗冀。人稠土狹。不足相供。而三輔左右及涼幽州內附。近郡皆土曠人稀。厥田宜稼。悉不墾發。今宜遵故。

愈不止江
浩荆湖

事徒貧民不能自業者於寬地

北齊天保八年議徙冀定瀛無田之人遷於幽州寬鄉以居之始立九等之法富者稅其錢貧者役其力臣按江右之人大半僑寓於荆湖蓋江右之地力所出不足以給其人必資荆湖之粟以爲養也江右之人羣於荆湖既不供江右公家之役而荆湖之官庥亦不得以役之焉是併夫之也臣請立爲通融之法凡江右之民寓於荆湖多歷年所置成產業者則名以稅戶之目其爲人耕佃者則曰承佃戶專於販易傭作者則曰營

生戶隨其所在。擄之於官。詢其所由。彼情願不

歸其故鄉也。

不願者勿強

則俾其供詞具其邑里。定

爲版冊。見有某人主戶。

本貫無人者不許

見當某處軍

匠。

遇闕依次勾解

明白詳悉。必實毋隱。然後遣官齎冊

親詣所居。供報既同。卽與開豁。所在郡邑收爲

見戶。俾與主戶錯居。

其役有產者出財。無產者

出力。如此通融。兩得其用。江右無怨女。荆湖無

曠夫。則戶口日以增矣。江右有贏田。荆湖無曠

野。而田野日以闢矣。是亦審民生。寬力役之道

也。

漢自高祖訖于哀平民戶千二百二十三萬三千餘口五千九百五十九萬四千餘漢極盛矣

臣按此西漢戶口極盛之數

桓帝永壽二年戶千六百七萬九百口五千六萬七千

臣按此東漢戶口極盛之數

隋承周得戶三百六十萬平陳又收戶五十萬泊于大業三年干戈不用唯十八載乃至八百九十萬

杜佑曰隋承西魏喪亂周齊分據暴君慢吏賦重役勤人不堪命多依豪室禁網墮廢姦僞尤滋高

頽觀流冗之病建輸籍之法定其名輕其數使人
知爲浮客被彊宗收大半之賦爲編戶奉公上蒙
輕減之征先歛其信後行其令。炁庶懷惠姦無所
容隋氏資儲逾於天下人俗康阜頽之力焉

胡寅曰方隋之盛也郡縣民戶上版圖者八百九
十餘萬自經亂離之後十存不能一二皆獨孤后
無關雖之法廢長立少而其禍至此也。

唐天寶十三載戶九百六萬九千

杜佑曰唐自武德初至天寶末凡百三十八年可
以比崇漢室而人戶纔比於隋氏蓋有司不以經

國馭遠爲意。法令不行。所在隱漏之甚也。

胡寅曰。明皇享國雖久。戶口雖多。不待易世而身自毀之。比禍亂稍平。幾去其半。徒以內有一楊太真。外有一李林甫而致之。嗚呼。可不鑑哉。

憲宗元和時。戶二百四十七萬三千。

胡寅曰。天寶初。戶幾一千萬元。和戶僅二百四十七萬。是十失其八也。憲宗急於用兵。則養民之政不得厚。重以用異。縛聚斂。受諸道貢獻。百姓難乎其阜蕃矣。

按天下盛衰在庶民。所以使民受害而戶口

不得阜蕃者必有其根故胡寅論隋氏之耗不

咎楊

玄李密

而咎獨孤后天寶之耗不罪安

山祿

史

思

而罪楊太真李林甫元和之耗則又歸其

獄於程昇皇甫鏞之聚斂焉嗚呼私意行於官

禁而災禍延於閭閻小人用於廟堂而毒害及

於黎庶戒哉

徐幹曰夫治平在庶功興庶功興在事役均事役均在民數周民數周爲國之本故民數者庶事之所自出也莫不取正焉

臣

按

今制每十年一次大造黃籍民年十五爲成丁
十四以下爲不成丁蓋得此意

制民之產

通典曰黃帝時八家爲井井開四道而分八宅鑿井
於中

臣按此井田之始

堯遭洪水天下分絕使禹平水土別九州冀州土白

壤

無塊曰壤

田中中

第五

兗州土黑墳

色黑而墳起

田中下

第六

青

州土白墳

土脈起也

田上下

第七

徐州土赤埴

土埴曰埴

墳田

上中

第二

揚州土惟塗泥

本泉也

田下下

第九

荊州土惟塗

泥田下中

第八

豫州土惟壤下土墳壚

疏也

田中上

第四

梁

州土青黎

黑也

田下上

第五

雍州土黃壤田上上

第一

九州

之地定墾者九百一十萬八千二十頃

舜典帝曰棄

稷之名

黎民阻饑汝后稷

主穀之官

播

佈也

時百

穀

穀非一種

臣

按史記言稷少好耕農民皆法則之堯舉爲

農師使教民稼穡則棄之爲稷堯時已然舜蓋

以舊官申命之也當是時水土有未平者堯旣

平之有可耕者矣故命棄播時百穀使民耕墾

以爲食使不至於阻饑焉

周禮太宰以九職任萬民一曰三農山澤平地生

九穀黍稷稻粱秫二曰園圃樹果蔬曰圃毓草木三

曰虞衡掌山澤之官作山澤之材作而用之四曰藪無水牧畜

地養也蕃盛也鳥獸五曰百工典事造飭化八材勤力

八者之材珠曰切象曰璧玉曰琬玉曰琰玉曰琢玉曰瑑玉六曰商貨行賈貨

阜盛也通貨金玉貨賄布帛七曰嬪有夫婦有結化治絲

繅者已泉絲之末八曰臣男之妾女之聚斂謂蓄疏

材可食也九曰閭民無常職八職有常轉移執事

即今傭僱為工作者

臣按先王分其民為九等九等各有所職之事

而命大臣因其能而在之。是以一世之民不爲三農則爲園圃，不爲虞衡則爲藪牧，否則爲百工，爲商賈，爲嬪婦，爲臣妾，皆有常職以爲之生。閒民則無常職，而於八者之間轉移執事，以食其力焉。雖苦無常職而實亦未嘗無其職也。是則凡有生於天地之間者，無一人而失其職，無一物而缺其用，無一家而無其產。如此則人人有以爲生物，物足以資生，家家互以相生。老有養，幼有教，存者以爲養，沒者以爲葬。天下之民莫不愛其生而重其死，人不遊手以穢食，不左

道以惑衆不羣聚以劫掠民安則國安矣

大司徒頒職事于邦國都鄙使以登萬民一曰稼穡
二曰樹藝

小司徒之職乃經土地而井牧其田野

臣按可耕之地爲井可畜之地爲牧

辨其野之土上地中地下地以頒田里上地夫

人各受二田百晦各受田百畝萊五十晦謂田

不耕餘夫亦如之正夫之外中地夫一廛田百晦萊

百晦餘夫亦如之下地夫一廛田百晦萊二百晦餘

夫亦如之

前漢食貨志聖王量能節事四民陳力受職民受田

上田夫百畝中田夫二百畝下田夫三百畝歲耕種

者爲不易上田休一歲者爲一易中田休二歲者爲

再易下田三歲更耕之自愛其處

麥於也更謂三歲即改與別家佃以

均厚

農民戶人已受田其家衆男爲餘夫亦以口受

田如比

比同也每大比二十畝

士工商家受田五口乃當農

夫一人

十畝

此謂平土可以爲法者也若山林藪澤

原陵淳

也鹵也

之地各以肥磽多少爲差民年二

十受田六十歸田七十以上上所養也十歲以下上

所長也十一以上上所強也。

臣按此言受田之法。大略與周禮大司徒遂人所言相同。周禮所載周家一代分田授民之法。皆出乎此也。

秦用商鞅廢井田開阡陌

朱熹曰東西爲阡南北爲陌古者因田之疆畔制其廣狹辨其縱橫以通人物之往來卽周禮所謂遂上之徑溝上之畛洫上之涂澮上之道也田間爲此所以正疆界止侵爭時蓄洩備水旱爲永久之計商君行苟且之政盡開阡陌悉除禁限所謂開者乃破壞剗削之意而非創置建立之名所謂

阡陌乃三代井田之舊而非秦之所置也。

臣按秦廢井田開阡陌說者皆謂開爲開建之
開惟朱熹則以爲開除之開焉夫自秦用商鞅
廢井田開阡陌之後民田不復授之於官隨其
所在皆爲庶人所擅有貴者可以買有勢者可
以占有力者可以墾有田者未必耕而耕者未
必有田官取其什一私取其大半蘇洵謂欲復
井田非塞溪壑平澗谷夷丘陵破墳墓壞廬舍
徙城郭易疆隴不可爲也縱使盡得平原曠野
而遂規畫於其中亦當驅天下之人竭天下之

糧窮數百年專力於此不治他事而後可葉適
亦謂今天下爲一國雖有郡縣吏皆總於上率
數歲一代是將使誰爲之乎就使爲之非少假
十數歲不能定也此十數歲之內天下將不暇
耕乎由是觀之則井田已廢千餘年矣決無可
復之理說者雖謂國初人寡之時可以爲之然
承平日久生齒日繁之後亦終歸於隳廢不若
隨時制宜使合於人情宜於土俗而不失先王
之意如朱熹所云者斯可矣正不必拘拘於古
之遺制也然則張載之言非歟曰載固言處之

有術所謂術者必有一種要妙之法其言隱而未發惜哉

漢文帝時董仲舒說上曰秦改帝王之制除井田民得賣買富者田連阡陌貧者亡立錐之地漢興循而未改古井田法雖難猝行宜少倣古限民名田名田古田也各爲立限不以贍不足塞兼并之路然後可善治使富者過制也

漢孝哀時師丹請建限田下其議孔光何武請吏民名田無過三十頃

北魏孝文時李安世上言田業多爲豪右所占奪雖

桑井難復宜更均量使力業相稱又所爭之田宜限
年斷事久難明悉歸今主上善其議下詔均天下人
田男夫十五以上受露田四十畝不栽樹者婦人二
十畝奴婢受田三十畝

唐授田之制成丁者人一頃其八十畝爲口分二十
畝爲永業二百四十步爲畝田多可以足其人者爲
寬鄉少者爲狹鄉狹鄉授田減寬鄉之半凡徙鄉及
貧無以葬者得賣世業自狹鄉徙寬鄉者得賣口分
已賣者不復受

臣按井田旣廢之後田不在官而在民是以貧

富不均一時識治體者咸慨古法之善而卒無
可復之理於是有限田之議均田之制口分世
業之法然皆議之而不果行行之而不能久請
斷以一年爲限如自今年正月以前其民家所
有之田雖多至百頃官府亦不之問惟自今年
正月以後一丁惟許占田一頃餘數不許於是
以丁配田因而定爲差役之法丁多田少者許
買足其數丁田相當則不許再買買者沒入之
其丁少田多者在吾未立限之前不復追咎自
立限以後惟許其鬻賣有增買者併削其所有

雖家生子將成丁者以田一頃配人一丁當

夫差役其田多丁少之家以田配丁足數之外

以田二頃視人一丁當一夫差役量出雇役之

錢富者出財田少丁多之家以丁配田足數之外以

人二丁視田一頃當一夫差役量應力役之征

貧者出力若乃田多人少之處每丁或餘三五十畝

或至一二頃人多田少之處每丁或至四五十

畝七八十畝隨其多寡盡其數以分配之此外

又因而爲仕宦優免之法因官品崇卑量爲優

免惟不配丁納糧如故其人已死優及子孫以

寓世祿之意

如京官三品以上免四項五品以上三項七品以上二項九品以上

一項外官則遞減之無田者準免丁惟不配丁納糧如故立爲一定之限

以爲一代之制名曰配丁田法既不奪民之所
有則有田者惟恐子孫不多而無匿丁不報者
矣不惟民有常產而無甚貧甚富之不均而官
之差役亦有驗丁驗糧之可據矣行之數十年
官有限制富者不復買田興廢無常而富室不
無鬻產田直日賤而民產日均雖井田之制不
可猝復而兼并之患日以漸銷矣